



**LOMIGA**  
**IANUARI**  
**&**  
**FEPUARI**  
**2026**



**ANOTUSI**

<b>AMATA 2026 I FONO A KOMITI TUMAU</b>	<b>1</b>
<b>FA'ATU 'AULOTU FOU— EFKAS VIRGINIA, 'ALA O LE ATUA'</b>	<b>1</b>
<b>LAUGA</b>	<b>4</b>
<b>FAAULUFALE MAOTA O LE GALUEGA— EFKAS FAGAMALO</b>	<b>5</b>
<b>UMUSA MAOTA O LE FAIFEAU— EFKAS OXNARD</b>	<b>6</b>
<b>SOLO LE MAFUTAGA FAIFEAU SOOFAATASI A UELIGITONE I LE PALEMENE I NIU SILA</b>	<b>6</b>
<b>TALA O GALUEGA I TOTONU O LE LAUMUA KANANA FOU</b>	<b>7</b>
<b>'E TASI LE FOAFOAGA MA LE TAGATA I LE FAAOLATAGA IA KERISO" (ROMA 8:18-23)</b>	<b>8</b>
<b>MAFUTAGA TUPULAGA TALAVOU PULEGA TUALAUTA &amp; LEASINA</b>	<b>10</b>
<b>SAAFIAFIGA MO POIALII FIASILI PUNI E. HALECK, TEUTUPE EFKAS 2010-2022</b>	<b>11</b>
<b>'AUFAGALUEGA AGAVAA MO LE GALUEGA TAUSI AULOTU</b>	<b>12</b>



**Fa'apaia 'Aulotu Fou, EFKAS Virginia, 'Ala o le Atua'**

O le aso 14 o Fepuari 2026 sa faia ai le sauniga faapitoa e faapaia ai se tasi o 'aulotu fou ua faatuina i le aai o Annandale i le sitete o Virginia i Amerika. O lea foi sauniga sa faailogaina ai le ofi mai o leni 'aulotu fou i totonu o le li'o o le Ekalesia Aoao, ma avea ai ma 'aulotu totino o le EFKAS. O le suafa o leni 'aulotu: EFKAS Virginia, 'Ala o le Atua'.

O se sauniga sa tulaga ese lona faatinoga, auā sa faia faatasi ma le osigāfegaiga a le 'aulotu ma lo latou faifeau fou, o le Susuga i le A'oa'o Kanana Fou ia Mario Lefti ma le faletua ia Taotafa Panama. E le gata i lea, a o le sauniga sa faauu ai foi ma le tofi Faifeau Samoa a le Susuga ia Mario Lefti, e pei ona pasia ai e le Komiti a le 'Au Toeaina i lana fonotaga ia Ianuari 2026. E to'a 4 foi Tiakono fou o le 'aulotu sa faapaia i leni sauniga. Ae tualuga le sauniga i le faamanatuga sa ta'ita'iina e le Susuga ia Mario Lefti, e faailoga ai le faauuina o lona tofi Faifeau Samoa.

O ia tualumaga uma sa molimauina ai le tulaga ese o leni sauniga. Auā o le mea e masani ai, e tofi lava le tualumaga sa ta'ua ma lana ia sauniga lotu tuma'oti e faatinoina ai. A o le sauniga lotu lea sa faia i Annandale i le faapaiaina o le 'aulotu EFKAS Virginia, "Ala o le Atua," e lima (5) lelei sauniga lotu eese sa fai faatasi i le taimi e tasi!

O le isi tulaga e mata'iina ai leni sauniga sa faia, e le gata o le to'atele o totino o le 'aulotu fou sa faapaiaina ai, a o le to'atele foi o tagata Samoa sa 'auai i le sauniga e molimau....

**Amata Galuega o le 2026 i Fonotaga a Komiti Tumau**

O le masina o Ianuari ua mavae sa usua ai fonotaga masani a Komiti Tumau, faatasi ai ma nisi o Mafutaga Lagolago—e faailoga ai le amata aloa'ia o galuega a le Ekalesia Aoao i leni tausaga fou 2026. Sa faatumulia le laumua i Kanana Fou i sui o Komiti mai Matagaluega ta'itasi o le Ekalesia, aemaise ai sui mai Matagaluega i fafo, sa malaga mai e 'auai i ia fonotaga taua. Na talo uma Komiti Tumau ina ia fono mai i Kanana Fou i leni tausaga, auā le tapenaga o mataupu mo le Fonotele a le Ekalesia Aoao ia Iulai 2026.

Na tomua fonotaga a Komiti i le fono a le Komiti o le 'Au Toeaina, lea na usua i le Aso Faraile, aso 9 o Ianuari. Na sosoo lea ma le asiasiga a le 'Au Toeaina i tua i 'aulotu ma Ekalesia i le Aso Sa, aso 11; ona toe faaauu lea o latou fonotaga i le Aso Gafua, aso 12, e tau atu i le Aso Lulu, aso 14.

E masani ona usua fonotaga a le 'Au Toeaina i le vaiaso lona tolu o le masina o Ianuari i tausaga ta'itasi. A o leni tausaga, ua vave ona usua, talu ai le Mafutaga ma le 'Au Toeaina EFKS e faia i Malua, Apia, sa fuafuaina mo le aso 16 o Ianuari e tau atu i le aso 19. Sa malaga atu le 'Au Toeaina i Apia mo lea faamoemoe ina ua mae'a lo latou fonotaga i Kanana Fou i le aso 14.

Sau se taimi ona faailo lea o i'ugafono a le 'Au Toeaina e tusa ai ma mataupu o lana fonotaga sa feagai ai. Ae pau le i'ugafono sa faailoa manino mai e le Komiti a le 'Au Toeaina ina ua mae'a lo latou fonotaga: o le fili-filiga o le Peresitene o le Kolisi Faafaifeau i Kanana Fou.

O le masina o Tesema 2025 na tula'i ese ai le Peresitene tuai o le Kolisi, le Susuga ia Dr. Moreli Niutoa FS. I lana fonotaga sa faia ia Iuni 2025, na faia ai le faai'uga o le Komiti a le 'Au Toeaina e faatula'i ese Niutoa pe a mae'a le tausaga faale-a'oga ia Tesema 2025, ma le fuafuataga, o le a filifilia le Peresitene fou a le Kolisi i lana fonotaga ia Ianuari 2026. O lea la ua faataoto le finagalo a Tamā o le....

**AMATA 2026 I FONO A KOMITI TUMAU....**

Fa'aauau mai le itulau 1

Ekalesia i lenei fonotaga, ua filifilia ai le Susuga i le Faifeau Faiaoga ia **Dr. Pasesa Sapolu FS** e avea ma Peresitene fou o le Kolisi Faafaifeau i Kanana Fou mo le lima (5) tausaga, 2026–2031. O isi tofiga a le Kolisi sa filifilia e le 'Au Toeaina e aofia ai le tofi Sui Peresitene, na filifilia ai le Susuga i le Faifeau Faiaoga ia **Dr. Ioelu Onesemo FS**; ma le tofi *Academic Dean*, na filifilia ai le Susuga i le Faifeau Faiaoga ia **Craig Masaniai FS**. O le aso 25 o Fepuari ua fuafua ai e le Komiti Fafoe se sauniga faapitoe e faapaia ai tofiga fou a le Kolisi, faatasi ai ma se tasi o Faiaoga fou o le a amata galue i le Kolisi i lenei tausaga faale-a'oa'oga ina ua faauuina ma mae'a lana faailoga MTh mai le Kolisi Faafaifeau o le Pasefika i Fiti, o le Susuga ia **Etele Falealii AKF** ma le faletua ia Tavai.

O le **Komiti o Tupe** sa usuia lana fonotaga i le aso 20 o Ianuari e tau atu i le aso 24. E tele mataupu taua sa feagai ma le Komiti o Tupe i lana fonotaga, e aofia ai: o le iloiloaina o Tala o Tupe a le Ekalesia mo le tausaga faale-tupe 2024-2025, o le iloiloaina o Tala Faatatau o Tupe mo le 2025-2026, o tala o tupe o le porokalame Penisione a Faifeau, o le porokalame FT03;29 i tupe nonō mo le atina'e o 'aulotu, o teugātupe a le Ekalesia i ana inivesi i le *UCC Cornerstone Fund* ma le *Territorial Bank of American Samoa (TBAS)*, aemaise ai, o le mataupu i le nonōgātupe sa faia mo le fausiaina o le maota fono a le 'Au Toeaina, ua fuafua e umusa i le Fonotele 2026.

Sa saūa i le faalogo nisi o Komiti sa fono ia Ianuari, sa fesiligia i totonu o latou fonotaga le tulaga o le nonōgātupe sa faia e le Komiti o Tupe mo le fausina o le maota fono a le 'Au Toeaina. O le fesili na fia malamalama ai sui o Komiti, pe na tuuina mai e le fonotele se faatagaga i le Komiti o Tupe e faatino ai lenei nonōgātupe e tusa ai ma aiaiga o le Faavae o le Ekalesia; afai e leai, po o le pule a ai na faataga ai.

O lenei nonōgātupe sa faia e le Komiti o Tupe, ma lagoonaina e le Lauaufono o le Fonotele, o se tasi lea o vaega o le **“fuafuaga tau tupe”** (*financial plan*) ua tele tausaga o afua-fua ma tapena mai e le Komiti o Tupe. O lenei “fuafuaga tau tupe” ua leva ona fuafua e fo'ia ai le faafitauli e tula'i mai pea i tausaga uma e usuia ai le fonotele o le Ekalesia: o le pasia e le fonotele o ni galuega a le Ekalesia fia fausia, ae leai se tupe e tua i ai le Komiti o Tupe mo le fuafuaina. E le fou lenei faafitauli. E tele foi isi galuega sa pasia e fonotele ua mavae, a o lea lava e lei faataunuaina, ona o le lē lava o tupe faasoasoa a le Ekalesia e tua i ai le Komiti o Tupe mo lona fuafuaina.

O lenei “fuafuaga tau tupe,” ua lata i le 15 tausaga o afua-fua ma faagaioi e le Komiti o Tupe, ma, e tolu (3) ona laasaga tuma'oti. O le laasaga muamua, o le matauina ma le iloiloaina o le tulaga o tupe maua a le Ekalesia i tausaga ta'itasi, o tupe faatatau ma tupe faaalu i lea tausaga ma lea tausaga, faatasi ai ma ana tupe totoe ma tupe faasili i lea tausaga faale-tupe ma lea tausaga faale-tupe. E 15 tausaga le mamao i tua na taula'i ai le galuega iloilo sa feagai ai ma le Komiti o Tupe (*financial analysis*).

O le tulaga sa silasila toto'a i ai le Komiti o Tupe ma fesiliga i lana iloiloaga o tala o tupe a le Ekalesia mai le 15 tausaga talu ai (*feasibility study*): faamata e gafatia e le Ekalesia Aoao—i ana tupe maua, o tupe faaalu, o tupe

faatatau, ma tupe totoe—ona faia ni inivesi po o ni teugātupe tetele e maua lea le pasene tului e maua mai ai, e aunoa ma le oia o lana tamaoiaiga faasoasoa e faagaioi ai ana galuega faatino i tausaga ta'itasi (*annual operation*)? Ona o le siitia pea o faigātaulaga a le Ekalesia i lea tausaga ma lea tausaga, faatasi ai ma le tulaga lelei o tupe totoe i tausaga faale-tupe ta'itasi, o le ala lea ua manatu ai le Komiti o Tupe: **“Ua o'o le Ekalesia i le vaitau e gafatia ai le faia o ana inivesi ma teugātupe tetele, e aunoa ma le oia o lona tamaoiaiga faasoasoa i tausaga ta'itasi.”**

O le laasaga lona lua o lenei “fuafuaga tau tupe” sa afua-fua ma faagaioi e le Komiti o Tupe, o le sailia o se faletupe po o se pisinisi tuma'oti e mafai ona faia ai ni inivesi ma ni teugātupe tetele a le Ekalesia. Ua leva ona mata'itū le Komiti i lea laasaga o lana “fuafuaga tau tupe,” e le gata o se faletupe po o se pisinisi tuma'oti e lelei se tupe tului e maua mai ai, ae saogalemu ma malupuipua ai ni tupe inivesi ma ni teugātupe a le Ekalesia, ona o le tele o mea faasese ma mea tau faavalea i nei ona aso (*investment scams*).

O Ianuari 2023 i Honolulu, HI, na maua ai le avanoa a le Lauau o le Komiti o Tupe, le Lauaufono o le Fonotele, ma nisi o sui o le Komiti a le 'Au Toeaina, e feiloa'i ai ma le Peresitene o le *UCC Cornerstone Fund*, le tina ia Maria Coyne. Sa ofo mai le fesoasoani a le Peresitene mo lea faamoemoe, faatasi ai ma se pasene lelei o tupe tului e maua, pe a finagalo le Ekalesia e tatala sana inivesi ma le *UCC Cornerstone Fund*. O Fepuari 2023 na tatala ai e le Komiti o Tupe le ulua'i inivesi a le Ekalesia i le *UCC Cornerstone Fund*, e \$1,000,000.00. I le taimi nei, Fepuari 2026, ua atoa le \$2,191,828.00 o le inivesi a le Ekalesia ua i ai nei i le *UCC Cornerstone Fund*.

Ona o le tulaga lelei o lenei inivesi, e i ai lālā o le Ekalesia na talosaga mai i le Komiti o Tupe e fia inivesi foi a latou tupe i le *UCC Cornerstone Fund*, e pei o le 'Au Taumafai, 'Au Leo-leo, Mafutaga Aoao a Tina, Mafutaga Aoao a Tiakono, ma le porokalame Penisione a Faifeau. A tuufaatasi le aofa'i atoa o tupe inivesi o lo o i ai nei i le *UCC Cornerstone Fund* i lalo o le faamalu o le EFKAS, o lona aofa'i e \$4,102,211.00.

E le na o le *UCC Cornerstone Fund*, ae na su'esu'e ma saili foi le Komiti o Tupe i le faletupe e tasi o le atunuu o lo o i ai, o le *Territorial Bank of American Samoa (TBAS)*. Ina ua mautinoa le tulaga lelei o tupe tului a le *TBAS*, faatasi ai ma le feutaga'iga sa faia ma le Pule o le *TBAS* i le malupuipua o inivesi uma e faia i le latou faletupe, o Fepuari 2025 na faagaioi ai e le Komiti o Tupe le tatalaina o le isi inivesi a le Ekalesia i le *TBAS*, e \$250,000.00 lona aofa'i.

Ina ua tulaga lelei ma solosolo manuia le laasaga lona lua lea o lana “fuafuaga tau tupe,” na amata loa ona mata'itu le Komiti o Tupe i se auala e faatino ai le laasaga mulimuli—o le faamautuina o le *credit-worthiness* a le Ekalesia. O le taua o lenei laasaga: so'o se taimi lava e moomia ai e le Ekalesia se seleni mo ana galuega faatino e pasia e le fonotele, e talia lava e soo se faletupe le talosaga a le Ekalesia mo se nonōgātupe tele, pe afai e lelei lana *credit*. Peita'i, pau le auala e mafai ona faamautu ai le *credit-worthiness* a le Ekalesia, o le faia o sana nonōgātupe tele, ae fa'aoga ai ana inivesi o lo o i ai nei e *collateral* ai. Ina ua pasia e le Fonotele Faafuase'i ia Ianuari 2025 le fausia pea o se maota fono tuma'oti a le 'Au Toeaina, o le avanoa lelei lea sa manatu ai le Komiti o Tupe, e faatino

ai le laasaga mulimuli lea o lana “fuafuaga tau tupe.”

Ua tulaga lelei tupe maua ma tupe faataata a le Ekalesia i lea tausaga ma lea tausaga. Ua tulaga lelei foi tupe totoe ma tupe faasili a le Ekalesia i tausaga ta’itasi, ua mafai ai e le Komiti o Tupe ona faataoto se alafua e toe totogi ai ni nonōgātupe a le Ekalesia e fai, e aunoa ma le oia o lana tupe faasoaso. O lo o i ai tupe teu ma tupe faaleoleo a le Ekalesia. O lo o tulaga lelei foi ma olaola inivesi a le Ekalesia o lo o i ai nei i le *UCC Cornerstone* ma le *TBAS*. E mua ona gaioti le Komiti o Tupe e faia le nonōgātupe e fausia ai le maota fono a le ‘Au Toeaina, a ua uma ona taoto le seleni e toe totogi ai le nonōgātupe e aunoa ma le oia o tupe faasoaso a le Ekalesia.

O le fesili, “Afai lava sa i ai tupe a le Ekalesia e mafai ona fausia ai le maota fono a le ‘Au Toeaina, aisea ua faia ai e le Komiti o Tupe le nonōgātupe o lo o atugaluga ai nisi?” O le tali, ina ia faamautiina ai le *credit-worthiness* a le Ekalesia, e pei ona ta’ua i le laasaga mulimuli o le “fuafuaga tau tupe” a le Komiti o Tupe. Afai e lelei ona toe totogi le nonōgātupe lea, o le a siitia le *credit-worthiness* a le Ekalesia, ona mafai lea ona toe faia isi nonōgātupe i le lumanai mo ni galuega tetele a le Ekalesia e fia fai. O lenei “fuafuaga tau tupe” ua faia e le Komiti o Tupe, e fo’ia ai le faafitauli masani e tula’i mai i taimi o fonotele: o le pasia e le fonotele o ni galuega tetele a le Ekalesia e fia fai, ae le lava tupe faasoaso a le Ekalesia e fuafua ma faatino ai.

O le **Komiti Faamisionare** sa usuia lana fonotaga i le aso 20 o Ianuari. O mataupu sa soalaupule ai le Komiti i lana fonotaga, o le iloiloa o ripoti mai misionare ta’itasi i nisi o tulaga e mafai ona fesoasoani atu ai le Komiti e tusa ai ma le galuega o lo o latou feagai ai. O le ‘aufaigaluega o lo o galulue nei i le galuega faamisionare a le Ekalesia Aoao e aofia ai: Sitau Ofoia Jr. FS (Hilo, HI), Faavevela Faitalia FS (Suisun City, CA), Paulo Lealaitafea FS (Medford, OR), Tautofi Taase (Midvale, UT), Sega Ifopo FS (El Paso, TX), Canton Fano FS (Lawton, OK), Faatoia Tufele FS (Clarksville, TN), ma Penieli Tela FS (Sydney, AU). O nisi galuega faamisionare sa faasoai le Komiti e ono tula’i mai i se taimi o i luma, o le galuega i le aai o Denver ma le galuega i le aai o Colorado Springs, i le sitete lava o Colorado.

O le **Komiti o Feau Eseese** sa usuia lana fonotaga i le aso 21 o Ianuari. O mataupu sa faasoai le Komiti i lana fonotaga e aofia ai le galuega o le maota fono a le ‘Au Toeaina, o le toe fuaina o le fanua a le Ekalesia i Atauloma, ma isi galuega fou ma galuega faaleleia a le Ekalesia o lo o taoto pea ona o le leai o se seleni e faatino ai.

O le **Komiti o Aoga** sa mua’i feiloai i lana asiasiga sa faia i le Aoga Mauaialuga i Kanana Fou i le aso 21 o Ianuari, ae sa usuia lana fonotaga i le aso 22 ma le aso 23 o Ianuari. O le taimi muamua lea sa feiloai ai le aotelega o le Komiti o Aoga ma le Pule fou o le Aoga Mauaialuga sa filifilia ia Aukuso 2025, le Susuga ia Dr. John Maiava. Sa faasoai le Komiti i taualumaga mo le aga’i i luma o le Aoga Mauaialuga, faatasi ai ma porokalame a le Ofisa o A’oa’oga Kerisiano mo lenei tausaga ma le Fonotele 2026.

O le aso 26 o Ianuari na feiloai ai le Laulaufono o le fonotele ma le laulau o le **Mafutaga Aoao a Tupulaga Talavou**. O le autu o lenei feiloaiga ina ia uuna’i ma faamalosi le laulau o le Mafutaga e faataunuu ana i’ugafono sa pasia i le fonotele

2024, aemaise le iloiloa lona lua o lana ta’iala. Sa ta’ua foi le 25 tausaga talu ona faavaeina le Mafutaga Aoao a Tupulaga Talavou, faatasi ai ma nisi o porokalame e fia faataunuuina i le fonotele 2026. Sa fautuaina le laulau o le Mafutaga e vave aumai sana paketi mo ia porokalame, ina ia fuafua ai se seleni e faataunuuina ai.

O le **Komiti o Atina’e** sa usuia lana fonotaga i le aso 27 o Ianuari. Sa talanoaina e le Komiti le faatulagaina o le *Philanthropy* a le Ekalesia ua faamoemoe e ave faamataupu i luma o le Fonotele 2026, faatasi ai ma ni fautuaga mo le faaogaina o le fanua i Atauloma e saili ai nisi atina’e mo le Ekalesia.

O le **Mafutaga a le ‘Au Taumafai** sa feiloai i luga o le zoom i le aso 29 o Ianuari. A o le **Mafutaga a le ‘Au Leoleo** sa fono i luga o le zoom i le aso 30 o Ianuari.

O se tala ootoo lena o fonotaga sa feagai ai ma Komiti Tumau ma nisi o Mafutaga Lagolago i le masina o Ianuari, mo le faamoemoe e tapena ai mataupu mo le Fonotele a le Ekalesia ia Iulai 2026.

## O LE LAUGA

*Mareko 10: 14, 15 “A ua silafia e Iesu ona tiga ai lea o lona finagalo, ua na fetalai atu fo’i ia te i latou; “Ina tu’u maia o tamaiti e o mai ia te a’u, aua le vavao ia te i latou; aua e fa’apei o i latou nei o e o i le malō o le Atua. E moni ou te fai atu ia te outou, ai se le talia le malō o le Atua fa’apei o se tamaititi, e le sao lava ia i ai”*

**Manatu Autu: “E sili lava le ola fa’alagolago i le Atua”**

O se tasi le nei vaega o le galuega tala’i a Iesu Keriso, o lo’o tu’ufesili ai pea mafaufau o nisi o le a faitau o le Tusi Paia. O le fesili, pe aisea lava ua fa’atusa ai e Iesu e o i le malō o le Atua i tamaiti? O le mafaufauga mauaialuga, e le to’atele ea a’oa’o o le tulafono tagata mauaialuga ma tagata matutua o ē malamalama i le tulafono e fai iai le filifiliga? Pe aisea lava ua fa’ataua ai e Iesu tamaiti e leai so latou tulaga i le fagasologa o faigamalo a Iutaia?

Atonu o ni mafua’aga fa’apena na mafua ai ona o atu so’o ma vavao i tamaiti. O le isi manatu, ai lava o lo’o fa’atino le galuega fa’a-so’o o le puipui i lo latou matai mai i mea uma e ono afaina ai. Peita’i e ese fo’i le silasila a le Ali’i i lea gaioga sa faia e ona so’o. O le gaioga sa faia e so’o o Iesu, e mafai ona tatou fa’apea o le vaai mauaialuga ma le manatu fa’apito. E mafai fo’i ona tatou fa’apea atonu o se tasi fo’i lea vaega o le to’atama’i o le Alii i ona soo. I le tala a Mareko, o le to’atama’i o le Alii i ona so’o, e afua mai lea i le leva ona latou galulue fa’atasi ae le o malamalama lava i la latou galuega o lo’o faia. O le fa’amoemoe mauaialuga o Iesu, ia vave ona malamalama ona so’o i la latou galuega o lo’o faia auā e iai taimi e na te tuua ai le mafutaga, a ua nofofale ia i latou le tala’iina o le malō o le Atua. O le ala lea o le vavao o Iesu i ona so’o ma ia fai atu upu ua fai nei ma matua. Fetalai Iesu, “Inā tu’u mai ia o tamaiti e o mai ia te a’u, aua le vavao ia te i latou; auā e fa’apei o i latou nei o ē o i le malō o le Atua.”

O upu a le Alii e pei e lē logomālie i le fa’alogo a le tagata matua, a o tua atu o nei upu o lo’o taoto ai se uiga loloto ma le tāua. O se uiga loloto ma le tāua e tatau ona malamalama



ai le au so’o ma iloa ai e leai se tagata e fa’atauva’a i le silasila a le Atua. Manatu nisi, na mafua ona fa’atusa e le Alii e o i le malō o le Atua i tamaiti ona o lo latou mamā ma le ponā a’o iti lava i latou. E lelei fo’i lea manatu, peita’i, a fa’apea o lea le fa’amoemoe, ou te taofi ua le aogā le fa’aolataga na maliu ma toe tu ai lo tatou Alii o Iesu Keriso. O le manatu o nisi o le au popoto ma le au su’esu’e o le Feagaiga Fou e fa’atatau i le fetalaiga lea a le Alii e fa’apea. O le fuaiupu e sefululima e atoa i ai le uiga o le fa’atusa o lo’o tautala ai le fuaiupu e sefulufā. Fetalai le Ali’i, “Ai se le talia le malo o le Atua fa’apei o se tamaititi; e le sao lava ia i ai.” O lo’o talanoa le Alii e fa’atatau i le mafutaga vāvālata a le tamaititi ma ona mātua. O le tamaititi a’o itiiti lava e fa’alagolago tele i ona matua i mea uma e mana’o ai. O ona mātua o lona malosi lea ma lona pototo e fai ai mea uma.

O le fe’au lea na avatu e Iesu i lea aso i ona so’o ma ē sa iai i lea nofoaga. O le finagalo o le Ali’i, ia goto ifo i loto o ona so’o ma e sa iai, e sili lava le ola fa’alagolago i le Atua. E fa’apei ona fa’alagolago o le tamaititi i ona mātua i mea uma, ia fa’apenā tagata uma o e fa’atuatua ma fa’alagolago atu i le Atua i mea uma e loto iai. O lea fo’i le fe’au taumolimoli a le tusitala o Mareko mo le au fa’atuatua sauāina i lona vaitau ona o pulega sāua a le malo o Roma. O le fa’amalosia a Mareko, ia fa’alagolago i le Atua ma le talitonu e māmā ai tigā o fa’asalaga o lo’o feagai ai.

O se fa’asoa a’o se fesoasoani lea a le talalelei mo tatou e ala atu i le nei lamepa. O le fa’alagolago i le Atua mo lana fa’asinomaga mo i tatou, e sili atu i lo tatou fa’amoemoe i so tatou iloa itiiti ma se malosi ua tatou maua. Manatua, e mavae mea uma a’o le Agaga o le Atua e tumau lea. O le vaivai o se tasi mafuaaga lea o le alofa mutimutivale o le Atua i le lalolagi. O le ala lea o le auina mai o lona Alo pele e to’atasi o Iesu Keriso. O le taulaga tutasi na maliu ma toe tu mai i le oti ma le tu’ugamau ina ia magalo a tatou agasala. Na afio i le lagi ae auina mai lona Agaga e fai ma fesoasoani sili e tatou te fa’alagolago iai i aso uma. Amene!!

**Saunia e: So’oso’o Tuiolemotu FS**



## EFKAS Virginia, ‘Ala o le Atua’

Fa’auau mai le itulau 1

i le faamoemoe. O le upu moni, e lei manatu le ‘Au Toeaina sa malaga atu e ta’ita’iina le sauniga, e to’atele faapea ni alo ma fanau o le atunuu, ma le Ekalesia, o lo o aumau i Virginia.

O le ‘aulotu fou lava ia e to’a 20 ona matafale, e aofia ai ulugalii ma o latou fanau ma ‘au aiga. O suafa o aiga ma matafale o le ‘aulotu: o le aiga o Alaimalo, aiga o Gaoa-Jackson, aiga o Pyles, aiga o Lauofo, aiga o Leaupepe, aiga o Fruean, aiga o Sopoaga, aiga o Capri, aiga o Lilomaiava, aiga o Lam Yuen, aiga o Porter, aiga o Ulugalu-Shirley, aiga o Iona, aiga o Niles, aiga o Owens, aiga o Tailele, aiga o Lefti Tiaoa-lui, aiga o Tauiliili-Khine, ma le aiga o Mareko.

E to’a 13 le aofa’i o Tiakono o le ‘aulotu, e aofia faatasi ai ma Tiakono fou sa faapaiaina i lea aso. O suafa o Tiakono fou o: Shirley Fruean, Siela Shirley, Fuaroso Lauofo, ma Luaiva Telona. O suafa o Tiakono tuai o: Novema Jackson, Amitu-anai Pyles, Fa’ia Lauofo, Leoo Peteru Lam Yuen, Samantha Leaupepe, Roy Lilomaiava, Talavai Iona, Perenise Tailele, ma Matuanalua Oloie Alaimalo.

E to’a 2 foi A’oa’o Fesoasoani o lo o galulue ai nei i le ‘aulotu: o le Susuga i le A’oa’o ia Papalii Pati Filimaua ma le faletua ia Sailelagi; ma le Susuga i le A’oa’o ia Faleafaga Mareko ma le faletua ia Vineta.

O le Lauaufono o le Ekalesia: o le Ta’ita’ifono—o le afioga i le Tiakono ia Matuanalua Oloie Alaimalo, o ia foi lea na saunoa faapitoa i le sauniga e fai ma sui o le Ekalesia i le taimi o le osigāfeagaiga; o le Failautusi o le Ekalesia—o le afioga i le Tiakono ia Amituana’i Lanuola Pyles; ma le Teutupe a le Ekalesia—o le afioga i le Tiakono ia Novema Jackson.

O isi tagata Samoa sa faatumulia ai le sauniga, o ‘aufaipese ma le ‘aufaigaluega mai i isi lotu Samoa e latalata ane, sa valaaulia e saunia viiga o le Atua mo le sauniga lotu. E lei maua suafa o le ‘aufaigaluega, a o ‘aufaipese sa saunia viiga o le Atua, o le ‘aufaipese a le Samoan Congregational Church, Joint Base Meyer-Henderson Hall, ma le ‘aufaipese a le First Samoan Church in Norfolk, Virginia. Sa ‘auai ma pepese foi le ‘aufaipese tuufaataasi a le Pulega Amerika Sasa’e—o sui mai le EFKAS Fayetteville ma le EFKAS Tafatolu mo Keriso sa ‘auai i le aufaipese tuufaataasi a le Pulega.

O totino o le ‘aulotu fou EFKAS Virginia ‘Ala o le Atua,’ o alo ma fanau o Samoa, ma le Ekalesia, o lo o feagai ma tautoga i vae ga ‘au a le Malo Tele i lea foi tafa o Amerika i le sitete o Virginia. O isi ua ritaea malolo ma nonofo ai e saili ai le lumana’i manuia o fanau ma aiga. A o isi, o matua ma aiga na malaga mai Samoa e asiasi i o latou fanau o lo o tiute ma galulue ai i lenei tafa o Amerika, a ua nonofo ai e saili togafiti i gasegase o le tino, ma fesoasoani i le tausiga o fanau o fanau ma saili ai o le lumana’i manuia.

O se fiafiaga tele i Tamā o le Ekalesia sa malaga atu ma ‘auai i lenei faamoemoe, lo latou molimauina o le to’atele o alo ma fanau o lo o naunau pea e fia galulue i le feau ma le galuega a le Atua. Auā o le tele o ‘aulotu fou i Amerika, e faateletelegese lo latou ofi mai i totonu o le Ekalesia Aoao. A o le tulaga lea ua faia e le EFKAS Virginia ‘Ala o le Atua,’ ua faatu le ‘aulotu fou, osi le feagaiga ma le faifeau fou, ma ofi mai i totonu o le Pulega ma le Matagaluega ma le Ekalesia

Aoao i le taimi e tasi; na o 'aulotu e toa le lotu ma tetele fatu mo le Atua ma lana galuega na te mafaia ia tulaga.

Ua to'a 2 ai nei 'aulotu totino a le EFKAS i totonu o le sitete o Virginia. O le isi 'aulotu, EFKAS Tafatolu mo Keriso, o lo o galulue ai le Susuga ia Tautua Aмоса FS ma le faletua ia Tofa. Sa amata lenei 'aulotu i le 2018 i lalo o le prokalama faamisionare a le Ekalesia Aoao. A o le masina o Iulai 2025, na osifeagaiga ai le 'aulotu ma le Susuga ia Aмоса ma le faletua, ma ofi mai i totonu o le Pulega Amerika Sasa'e, Mata-galuega a Amerika, e fai ma 'aulotu totino o le EFKAS.

Ua to'a 4 ai nei 'aulotu o le Pulega Amerika Sasa'e, e aofia ai le 'aulotu EFKAS Talalelei o le Vaomoana i Ft Knox, KY, o lo o galulue ai nei le Susuga i le Toeaina o le Pulega, Faleu Fatu FT ma le faletua ia Areta; o le EFKAS Fayetteville, NC, o lo o galulue ai le Susuga i le Faifeau ia Manaomia Tauanuu FS ma le faletua ia Seela; o le EFKAS Tafatolu mo Keriso e pei ona ta'ua, o lo o galulue ai Tautua Aмоса FS ma le faletua ia Tofa, ma le 'aulotu fou sa faapaiaina, EFKAS Virginia 'Ala o le Atua,' o lo o galulue ai Mario Lefiti FS ma le faletua Taotafa.

O Susuga i Toeaina ma le 'aufaigaluega sa malaga atu e 'auai ma ta'ita'iina lenei faamoemoe taua: o le Laulaufono o le Komiti a le 'Au Toeaina—o le Susuga i le Ta'ita'ifono, Susuga i le Toeaina ia Dr. Liona Thompson FT (*EFKAS Ola Fou Long Beach Muamua*) o le sa ta'ita'iina le sauniga; ma le Failautusi o le Komiti, le Susuga i le Toeaina ia Dr. Leatulagi Faalevao FT (*EFKAS Amouli*), a o le Sui Ta'ita'ifono o le Fono-tele, sa ta'ita'iina le faauuina o le tofi Faifeau Samoa. O le Susuga i le Toeaina o le Pulega Amerika Sasa'e, Susuga ia Faleu Fatu FT (*EFKAS Talalelei o le Vaomoana*), sa ta'ita'iina le sauniga o le osigafeagaiga; a o le Susuga i le Toeaina ia Salesa Faalau FT (*EFKAS Sacramento*) sa saunia le talosaga e faapaia ai. O le Susuga i le Toeaina ia Nofoaiga Moi FT (*EFKAS Seattle IV*) sa saunia le tatalo e faapaia ai le faauuina o le tofi Faifeau Samoa. O le Susuga i le Toeaina ia Ekitoa Sopoaga FT (*EFKAS Ta'u, Manu'a*) sa ta'ita'iina le faauuga o Tiakono fou. A o le Susuga i le Toeaina ia Ailao Tofaeono FT (*EFKAS Etena Fou*) sa saunia le Upu Folafofa mo le faamoemoe.

Sa malaga foi ma 'auai le Susuga i le Feagaiga ia Iasepi Ulu FS ma le faletua ia Leone (*EFKAS Fagatogo*). Sa tofia le Susuga ia Ulu e fofogaina le Tusi Paia i le taimi o le sauniga. A o le ala o lo la 'auai, ona o le Ekalesia EFKAS Fagatogo sa galulue ma lolotu ai le Susuga ia Mario ma le faletua ia Taotafa i le taimi sa o'tauina ai i le Kolisi Faafaifeau i Kanana Fou, seia oo na faauu ia Iulai 2025.

Sa 'auai foi le Susuga i le Feagaiga ia Apisaloma Toleafoa FS ma le faletua ia Lora (*EFKAS San Francisco*). O le Susuga ia Toleafoa ma le faletua, o i la'ua ia o ulua'i misionare sa auina atu e le Ekalesia ia Setema 2018 e amataina le galuega faamisionare i Virginia sa galulue ai le to'atele o i latou ua faavaeina nei le 'aulotu fou, EFKAS Virginia, 'Ala o le Atua'.

Ina ua mae'a le sauniga i lea aso, ona fa'aafe lea o le 'aufaigaluega ma le 'au valaaulia i le Hall a le Ekalesia mo le taumafataga ma faaalologa e pei ona masani ai, a o tapua'i le paia o aiga i itu tetele ma itu taulagi e faasino i le Susuga i le Faifeau ia Mario Lefiti ma le faletua ia Taotafa. Ia manuia le galuega fou, EFKAS Virginia, 'Ala o le Atua'. O le a tapua'ia a outou faiva e le Ekalesia Aoao ma Tamā o le Ekalesia. Ia maualuga le viiga o le Atua i mea uma tou te faia.



## Faaulufale Maota o le Galuega—EFKAS Fagamalo

O le fa'amoemoe ua taunu'u, o le la'au o le soifua lea! O Oketopa 31, 2025, sa faia ai le sauniga e umusa ai le galuega fou o le "Amate Hall," sa fatuatia ai le Susuga i le Feagaiga ia Mathew Failauga FS ma le faletua ia Mauimalo, faapea le paia o le Ekalesia EFKAS Fagamalo.

Sa vaia laufofoga fafia o le Susuga i le faifeau ma le faletua ma le mamalu o le Ekalesia i lea aso, ona o le galuega sa lei faigofie lona faatinoina, aemaise ai, sa taumate i le ete pe tua ma ni a le faamoemoe. Ae peita'i, o lea ua tali faaliali le Atua ina ua aumaia le laolao lelei e faataunuuina ai le sauniga e faapaiaina ai le galuega, o le taulaga osi lea a le Ekalesia mo le Atua ma lana galuega i totonu o le nuu ma le afioga.

O le Susuga i le Faifeau Toeaina o le Pulega a Fofu ma Alataua, le Susuga i le Toeaina ia Fa'aeteete Saifoloi, a o le Afioga i le Ta'ita'ifono o le Fonotele EFKAS, sa saunoa mo le sauniga lotu mo le fa'apaiaina o le galuega fou. O le Susuga i le Feagaiga ia Mathew Failauga FS na saunoa mo le Tala o le Galuega. A o le Tina o le pulega, le Faletua o le Toeaina ia Mina Saifoloi, sa o'ti'ina le lipine mo le tatalaina o faitoto'a o le galuega fou.

O le 'aufaigaluega faifeau ma a'oa'o o le pulega a Fofu ma Alataua ma o latou faletua, sa valaaulia e fai ma molimau o lea aso taua. Ae sa to'atele fo'i nisi o le atunu'u ma le Pulega, faatasi ai ma le 'aufaigaluega valaaulia, sa 'auai e molimauina le faamoemoe. A o le Susuga i le A'oa'o ia Fa'ataga Muta sa fai ma fofoga o le ekalesia i le taimi o taumafataga ma fa'aaloaloga e pei ona masani ai le atunu'u.

O se aso lagi lelei ma le matagofie i le alofa ma le agalelei o le Atua. O se ekalesia to'aititi, ae ma'eu le lotu tetele mo le galuega a le Atua. Ia vi'ia pea le Atua fai mea sili e fa'avavau.

Avea fo'i lenei avanoa e momoli atu ai le agaga fa'afetai tele i le Ekalesia Aoao ona o la outou tapuaiga. Fa'afetai fo'i i le Ekalesia i Fagamalo i ona vaega ta'itasi i le fa'ama'ite mea lelei auā le atina'eina o le fe'au ma le galuega a le Atua e ala i le fale o le galuega. Ia fai lea ma vi'iga o le Atua, e tusa ai ma mea uma ua tatou faia. Ia aoga fo'i lenei fale, e tua i ai le 'aufaigaluega ma le Ekalesia ma ana galuega fa'atino. **Saunia e So'oso'o Tuilemotu FS**





## Umusa Maota o le Faifeau— EFKAS Oxnard

“Aua ne’i ia te i matou le Alii e, ‘aua ne’i ia te i matou, a ia tuuina atu le viiga i lou suafa ona o lou faamaoni.” O upu tomua ia mai le Afioga Paia a le Atua na saunoa i ai le Susuga i le Feagaiga ia Gafoa Pulu Jr. FS i le amataga o le sauniga e faapaiaina ai le mae’a o le galuega o le Maota o le Faifeau a le Ekalesia EFKAS Oxnard. O le galuega ua leva ona moemiti ai le Ekalesia. Sa punonou le Ekalesia i le tatalo i le ao ma le po, ma tuuina atu i le Atua le faamoemoe. A o le aso 31 o Ianuari 2026 na tali mai ai le Atua i talosaga a le Ekalesia, ina ua aulia manuia le aso sa atofaina e faapaiaina ai le mae’a o le galuega.

Molimau le Susuga i le Feagaiga ia Gafoa Pulu Jr FS, o lenei galuega e le o se galuega fou, a o le galuega toe faafou ma toe faaleleia. O Novema 2024 na finagalo ‘autasi ai le Ekalesia e faatino lenei galuega, ina ua vaaia le tulaga faaletonu o le fale o le faifeau sa i ai. Sa saili e le Ekalesia sa fale mautotogi e alala lē tumau ai le faifeau ma le faletua ma lona aiga, a o fuafua le galuega.

Ina ua mae’a ona tuufaatasia le ata o le galuega faafou ma mautu le seleni e faatino ai, o Iulai 2025 na amata ai loa le galuega. Na talai ese uma mea tuai ma laupapa ua pala o le fale i totonu o potu, o le umukuka, faapea le potu talimalo. Sa ati uma luga le fola tuai ma suia i le fola fou, faatasi ai ma le falealuga na toe sui atoa. Sa toe faafou uma foi meāfale o le fale, faatasi ai ma nai faapoopoga sa faia mo le faamatagofeina o le maota e alala ai le Feagaiga Taulagi a le Ekalesia ma le faletua ma lon aiga. O le tau atoa o le galuega, o lona aofa’i e \$200,000.00.

O le molimau a le Faifeau, o le vaega muamua lea o le faasologa o galuega fuafuaina ua finagalo ai le Ekalesia mo le fa’aleleia o ana meatotino ma lona fanua. O isi galuega fuafuaina a le Ekalesia o lo o sosoo ai nei o le toe faafouina o le Malumalu tapua’i ma le toe faaleleia o le Hall a le Ekalesia.

E fa’afetai pea le alofa ma le agalelei o le Atua ona o le malosi ma le tamaoiga ua la foa’i mai i totino uma o lenei Ekalesia e fa’atino ai pea measili mo la ma lona finagalo. E fia fa’amau foi le fa’afetai tele i Aiga ma Aulotu sa fesoasoani aua lenei fa’amoemoe ta’ua. O le tutu fa’atasi o fanau a le Atua, e manuia ai soo se mea latou te faia. Malo Oxnard fai mea sili!

## Solo Mafutaga a Faifeau Soofaatasi i Ueligitone i le Palemene a Niu Sila



O le aso 11 o Fepuari 2026, na solo ai le Mafutaga a Faifeau Soofaatasi i Ueligitone, ae ta’ita’i e le Susuga i le Faifeau Toeaina ia Malaki Muaiava FT o le Ekalesia EFKAS Wainuiomata, e momoli aloa’ia le tusi talosaga—o le sainigā lima e silia ma le 50,000 tagata o le Pasefika—i le Palemene o le mālō o Niu Sila i luma o le maota fono i Ueligitone, le laumua o Aotearoa.

O le faamoemoe autu o lea sainigā lima e talosagaina ai le Palemene a Niu Sila ‘ina ‘ia fetu’una’i aiaiga o femalaga’iga mo tagatanu’u o le Pasefika e iai Samoa, Fiti, Toga, Tūvalu ma isi, ma ia aloaia se visa tolu māsina (visa free travel) e fa’ataga ma faigofie ai le malaga atu o nai o tatou aiga i mea fai fa’ale’āiga i Niu Sila.

I le taimi nei, e 60 atunu’u o lo o i ai le visa 3 masina e latou te maua e aunoa ma ni tusi apalai. Peitai, e lē ‘o fa’apenaina mo tagatanu’u o le Pasefika. A manana’o tagatanu’u o le Pasefika i se visa asiati, e 3-4 vaiaso e apalai ma faatali ai toe totogi le tupe pe a ma le \$400NZ. A le manuia lana tusi apalai, e le gata ina lē mafai ona malaga i Niu Sila ae e le toe maua foi le tupe.

Sa amatalia lea fa’amoemoe i le sauniga lotu sa ta’ita’iina e le Susuga i le Toeaina ia Muaiava, o ia foi o le Ta’ita’ifono o le Mafutaga a Faifeau Soofaatasi i Ueligitone. I le mae’a ai o le sauniga ma saunoaga lautogia o lea aso, sã tauaaoina le tusi talosaga e le Afioga ia Anae Arthur Anae, o lē sa fai ma faipule o Niu Sila i ni tausaga ua mavae, ma taliaina aloa’ia e le Sui Palemia o Niu Sila, le Afioga ia Vaovasamanaia Winston Peters, o le Ta’ita’i foi o le Vaega Faaupufai o le New Zealand First (NZF). Sa saunoa le Sui Palemia i lona lagoonoina o le faamoemoe ma o se aso olea ia fa’aleoa ai i luma o le Palemene o Niu Sila.

Mo le silafia lautele, o lea tusi talosaga o lo o lagolagoina e le Malo o Samoa, le Afioga i le Palemia ia Laaulialemalietoa Leuatea Polataivao Fosi Schmidt ma le Palemia o Fiti, le Afioga ia Sitiveni Rabuka. E 7,000 tagata Pasefika sa auai atu i le solo i lea taeao, ma ‘ua taoto nei i le malo o Niu Sila le mataupu. Faafetai tele i lau Susuga i le Faifeau Toeaina Muaiava i le alofa i tagata o le Pasefika; faafetai le faaeaea Ekalesia!



# Tala o Galuega i Totonu o le Laumua i Kanana Fou

Ua aga atu le Ekalesia Aoao mo lana Fonotele i lenei tausaga i le masina o Iulai. Sa avatu i le Lamepa o Novema-Tesema 2025 se tala ootoo i le Maota Fono a le 'Au Toeaina o lo o faagai nei i totonu o le Laumua. Peita'i, e tele foi isi galuega o lo o fausia i totonu o le Laumua, aemaise o maota o Pulega o lo o faamoemoe e nofoia ma faaogaina i le Fonotele ia Iulai 2026. O se tala ootoo lea e tusa ai ma ia galuega.



## Galuega Maota Pulega Seattle

Molimauina le agalelei o le Atua i le gasologa manuia o lenei galuega. Saunoa manino le susuga ia Noel Singit ua fai ma ta'ita'i o le galuega, o lo o fa'amoemoe o le masina o Iuni e mae'a ai le galuega. O le kamupani a le zE Corporation o lo'o gafa ma lea fa'amoemoe taua. O le maitau i le galuega, ua fa'asolo ina teuteu ma fa'amae'a nisi o vaega o le fale. E fa'afetai ai i le mamalu o le Pulega Seattle i se utaga poto ma le tofa loloto ua fa'ama'ite ai lea fa'amoemoe taua.



## Galuega Maota Pulega USO

Sa maua le avanoa e fa'asoa ai ma se tasi o le 'au tufuga a le konekarate, Quality Painting Corporation, o lo o faafoeina lenei galuega. Ua fa'ailoa mai, o lenei galuega ua fuafua e fa'amae'a i le fa'ai'uga o le masina o Iuni. O le susuga ia Atuatasi Seigafo Jerry o le Pule Sili o le Quality Painting. O lana molimau, e to'a 9 le kamuta o lo o feagai ma le galuega, ma o lo o sologa lelei le galuega i ona tulaga uma.



## Galuega Maota Pulega Vaifanua

E tusa ai ma le molimau a se tasi o le 'au kamuta, o lenei galuega ua fuafua mo le fonotele i lenei tausaga. O le toe lipa ma le toe faaleleina o le fale atoa, fa'atasi ai ma le vaevaeina o totonu o le fale mo potu e fa'aaogaina e le 'aufaigaluega o le Pulega Vaifanua. O le 'au kamuta Vietnamese o lo'o feagai ma lea galuga. E to'a 6 le afa'iga o le 'au galulue, ma o le latou molimau, o lo'o sologa manuia mea uma o le galuega



## Galuega Faalautele o le Fale Samoa

Ua loa tausaga o tautua le Fale Samoa i le Kolisi Fa'afai-feau i Kanana Fou, aemaise ai le Ekalesia Aoao, i ni ana taligamalo po o ni porokalama fai e potopoto ai le Kolisi po o le Ekalesia. O lenei Fale Samoa sa fausia e le Mafutaga a le 'Au Leoleo i le 1995 e faamanatuina ai lana Iupeli Auro. O lona uiga, ua atoa nei le 30 tausaga o le fale. E ui i le tele o ona tausaga, ae tumau pea le tulaga lelei ma le mausali o le fale ona o le matagofie o lana fausaga.

O le galuega faaleleia o lo o faia nei i le Fale Samoa, ua toe tatala i tua le si'o o le fale, pe a ma le 6ft mai le tulaga sa i ai, ina ia faalautele le fale mai le mea o lo o i ai nei. Ua faia lenei fuafuaga ona o nisi o taligamalo a le Ekalesia i le tuana'i, sa vaaia ai le le'ofi o le Fale Samoa. Ae le gata i lea, e tulata le Fale Samoa i le Maota Fono a le 'Au Toeaina o lo o fausia nei. Atonu o le avea le Fale Samoa ma le tulaga ua toe faalautele ai, e fai ma fale e tua i ai le Maota Fono a le 'Au Toeaina, aemaise o taimi o taumafataga.

O le konekarate o le "Jay's Construction" o lo o feagai ma le galuega, e aunoa ma se totogi, auā o le konekarate foi lea o lo o feagai ma le fausiaina o le Maota Fono a le 'Au Toeaina. O le tala mai a "Jay's Construction," e mae'a faatasi le galuega o le Fale Samoa ma le Maota Fono a le 'Au Toeaina.

# E Tasi le Fofoaga ma le Tagata i le Faaolataga ia Keriso (Roma 8:18-23)

Saunia: Dr. Elekosi Lafitaga FS (EFKAS Vaitogi)

## I. Upu Tomua

Soo se gagana tautala, e tofua le upu ma lona uiga masani. Ae peita'i, e le mafai ona gata i lona uiga masani le tatou malamalama atoatoa i se upu. E iai uiga e pipii i upu i lona taimi e faaogaina ai, e ta'u e niisi o tualeelele o le upu, e aofia ai mea o loo tutupu i se vaitau, o tagata ma amioga, o polokiki ma lagona na afua ai se upu pe mafua ai ona faaogaina le upu. E faapena fo'i i va-i-upu, poo so'otaga o upu i se fuaiupu, e fa'apoopoo i le uiga o upu. O le fuaiupu, "I have a dream!" A faauiga i lona uiga masani, o lona uiga sa fai la'u miti i le po ua mavae. Ae a manatua o upu nei na saunoa ai si alii o Martin Luther King, ua ese fo'i le uiga pe a mafaufau i mea na tutupu i lona vaitau ma le mafuaaga na saunoa ai i upu nei.

A tu'u fo'i i le gagana tusitusi, o perioti, koma ma koma liliu, le faamamafa, ma mea uma faapena e faaopoopoo fo'i i uiga o upu. E le tioa a tatou faapea, e uiga lasi upu o le gagana. Afai lava fo'i ua alu atu le upu e pa'i lelei i le mea o loo ola ai le tagata faalogo, ua faaopoopoo ai fo'i iina isi uiga o upu. O le taofi, afai e mafai ona oo le malamalama i uiga atoatoa o upu ma le faaogaina, ona moni lea o le manatu, e mana, aanoa ma fai agaga o upu. E le tioa fo'i Ioane a faatusa Iesu i le lokou. Aua, e toetoe a leai se eseeseaga o upu ua gaganaina, ma le o loo tautala.

Ina ua silafia e sikola i ona po nei le taua o ia mea mo le faitauina o tusitusiga o aso ua tuana'i, ua manatu ai isi, e ao ona iloilo lelei ma vaai faapea i le Tusi Paia, ae maise le taga'i toto'a i le gagana o loo faaogaina ai. O a uiga masani o upu ma ona fuaiupu? O a ni tualeelele o se upu ma fua'iupu e ese mai i ona uiga masani? A o a fo'i ni manatu fou e fua mai i le toe faaogaina o upu i se taimi ese mai le ulua'i taimi na faaogaina ai? O mea nei, e aofia uma i le faauigaina o upu o le Tusi Paia.

O se faaitaiga, o le upu Eleni "logos," ua faaSamoa e tatou, lokou. O le uiga masani o le "logos" - o le upu, "word." A o lenei ua faaogaina e Ioane i lona vaitaimi e faatusa ai Iesu. E iai isi upu Eleni e mafai ona faaogaina, ae ala ona faaogaina e Ioane le upu Eleni, "logos," aua fo'i ole masani o lea upu i le aganuu faaEleni e fesoota'i ma galuega faatino e fua mai i le tofa fetuuna'i o le mafaufau, "wisdom." Ae ina ua faaogaina e Ioane e faatusa i a Iesu, ua faaopoopoo ai ma isi uiga o le upu sa le'i iai muamua: o le tofa loloto a le Atua na afua ai o ana vavega mamana, e aofia ai ma le fofoaga mai le amataga. O nei mea uma, ua avea ai ma tualeelele o le upu Eleni, "logos," i le tusi o Ioane ina ua tuu ai ma uiga faalutaia. A faalogo la iai le lutaia o loo ola i le vaitau e malosai ai le tu faaEleni, e malie i lana faalogo, ona taliagofie lea e lona loto ma le mafaufau aua e talafagagai lelei i lona malamalama faalutaia.

O le faamoemoe o le vaega muamua o lenei pepa, ina ia tau latalata le tatou malamalama i aano ma agaga o saunoaga ma tusitusiga a e na mua'i fetalai ma tusia upu o le Tusi Paia. E ta'u e niisi lea metotia o le faitauina o le Tusi Paia, *Social*

*Rhetorical Interpretation.* O lona uiga, o le vaai i sootaga o upu ma fua'iupu ua faaogaina i le fesoota'iga o tagata ma mea tutupu (*society*), e pei ona ta'ua i luga, faatasi ai ma le faaogaina o le gagana i se auala e ua'i atu ai le faalogo o le tagata ina ia talitonu (*rhetoric*). Aua afai e le malamalama le tagata i le sootaga o upu i mea tutupu ma masaniga o le olaga i le vaitau na faaogaina ai, e le malie i le 'aufaalogologo pe le maua atoa le uiga o se upu ma lona faaogaina.

E tolu la vaega o lenei pepa. O le vaega muamua e pei ona ta'ua i luga, o le faauiga (*interpretation*) o Roma 8:18-23 e ala i le metotia ua ta'ua. O le vaega lona lua, o le faaliliu (*translation*) o le uiga o Roma 8:18-23. A uma ona faaliliu le uiga, o le a tatou faasoa i se auala mo le faaogaina (*application*) o Roma 8:18-23 i le vaega lona tolu. O le faauiga, faaliliu, ma le faaogaina.

E le o se mea faigofie fo'i le faaliliu o se gagana. E ese le faauiga (*interpret*), e ese fo'i ona faaliliu (*translate*). E iai taimi e toe a leai se eseeseaga o le faauiga ma le faaliliu o se upu, ae iai foi taimi e le o gatusa ai le uiga ma le faaliliu. O se faaitaiga, e leai se upu Samoa e faaliliu lelei ai le uiga o le upu Eleni "logos" e pei ona faaogaina e Ioane. E leai se upu e tasi e fesoota'i ai le "upu," le mafaufau fetuuna'i, galuega faatino, le Atua, ma Iesu e pei o le uiga faalutaia ua faaopoopoo i le upu Eleni, "logos."

Ae a faaliliu fo'i se upu mai se isi gagana, e iai avanoa e faaopoopoo ai uiga fou o le upu. O se faaitaiga, e mafai ona tatou faapea, o le "tofa faaleAtua" e faaliliu ai le "logos." Ae a faaogaina le upu "tofa," ua faaopoopoo atu ai e le ta gagana le fetuuna'iga e masani ona faatino i le po pe a fili ma iloilo le mafaufau mo se faai'uga lelei e fai. E le gata iina, e mafai fo'i ona le ilo atoatoa uiga na sa iai muamua pe a faaliliu i se gagana fou. O lona uiga, e leai se faauiga ma se faaliliuga e asa ma se ma'umau. Ae tatou te taulalata lava iai, pe a tatou vaai i le aano poo le agaga o upu, e fesoota'i ai gagana e lua i le faaliliuina (*translation*) o uiga o upu (*interpretation*). Ona tau maua lea o se ata lelei e faaogaina ai.

Mo lenei pepa, ua ou faaliliuina le uiga o Roma 8:18-23 mai le gagana Eleni, Peretania, i le gagana Samoa, i le upu (*concept*) Fanua ma ona tualeelele, aua mo se tatou faasoa.

## II. O le Faauigaina o Roma 8:18-23

O le mataupu e 8 o loo talanoa ai Paulo i le taua o le matafaioi o le Agaga o le Atua. Amata le mataupu e valu (8) i le faafitauli o loo feagai ma tagata o le lalolagi, atoatoa ai ma le taua o le Agaga o le Atua i fuaiupu 1-17. Ona liliu lea o Paulo e talanoa i le mataupu e uiga i mea na faia e le Atua, poo le fofoaga, mai le fuaiupu 18-23. O le faalavelave, e faalēmanino lelei le fesootaiga o le Agaga i fuaiupu 1-17 ma le fofoaga i fuaiupu 18-23. O le a le taua o le fofoaga? A o le a le fesootaiga ma le Agaga?

E le taumate ua see ese Paulo mai le autu o le mataupu, e pei ona amata mai i le v.1-17, o matafaioi o le Agaga o le Atua i lona va ma tagata. Ua ia taumafai e faamanino se mea sa le'i manino muamua. Tatou te iloilo le taumafai o Paulo e faamanino se vala i lona faapea mai i le fuaiupu v.18, "Auā o lo'u manatu..." male sosoo o lona faaogaina o le upu "Auā." A faaPeretaniaina, o lona uiga, "for or because." O le faapea mai o Paulo, "Aua o lo'u manatu..." o le faailoga lea ole faatuina e



Paulo se manatu autu ma o le a sauni e faafinauina. O se manatu e faaee pei o se auau o le fale. E mua'i faae'e, ona velo ai lea o 'aso e faamautu ai. E faapena le mea o loo taumafai ai Paulo i le fuaiupu v.18, e tusa ai ma faiga masani iina ona aso i finauga faitele. Fai mai ina ua fetuuna'i lona mafaufau i mea o loo tutupu "i nei ona po" (*in the present, τὸν νῦν καιρὸν*), ua a'e se manatu i a Paulo ma faapea ai, "e le faatusaina o mea e tiga ai ma le manuia atali o loo ua faaalua."

O fuaiupu e v.19-23, ua aga atu Paulo e taumafai e finau lona manatu autu e pei ona ta'ua i le v.18. Ma e mafai ona vaevae i ni vaega se lua: vv.19-21 ma le vv.22-23. A o nei vaega e lua, e mafai ona tatou faapea, o loo tusia e faapei o ni fuaiupu e o faatasi, poo ni vaega e vaavaalua aua e foliga tutusa o la faaupuga. O le ta'u faalua faapea o upu i totonu o faamatalaga, o se tasi lea o metotia i le gagana tautala e taumafai e faatosina mai ai taliga i se mea tāua. Auā, afai e ta'u ma ta'u pea, e le mafai ona galo. I le ma lea, e malie i le faalogo. E pei o le gagana faafailauga e taumafai e ua'i mai ai le fia faalogo o tagata.

E pei ona ta'ua, o le fuaiupu 18, o se manatu faatu. E iai le taofi a le fai pepa, ua faaopoopo e Paulo o isi uiga i luga o le uiga masani o le manuia atali. O fuaiupu e 19-21, o loo faamatala mai le vaaiga o le foafoaga. I lea vaaiga, ua pei le foafoaga o se tagata (*personification*). Ua mafatia i le faatama'ia ma ua lilo galuega lavea'i o le Atua. I le fuaiupu e 21, o loo ta'ua ai le faamoemoe o le foafoaga mo se sa'olotoga aua ua pei o se tagata faatauvaa ua le amana'iaina, poo se pagota i le nofo pologa i le faaleagaina. O lona uiga, ua aofia fo'i le foafoaga i le faauigaina e Paulo le manuia atali. A o se manatu e toe fo'i a i le amataga o lana tusi i le mataupu muamua (esp. Rom 1:18-32) na ia faapea ai i le Roma 1:20:

"Aua o ana mea e le vaaia talu ona faia o le lalolagi, e vaaia lava ia i le mafaufau i mea na faia, o lona mana faavavau lava lea ma lona Atua; o lea foi ua le mautali ai i latou."

O lona uiga, sa le'i iai se ie pupuni i le fevaia'i o le Atua ma mea uma na ia faia (foafoaga) e aofia ai le tagata mai le amataga. E faaali mai i mea na ia faia le mamalu ma le silisili ese o le Atua. Peita'i, ua oi le foafoaga ona o le lē amana'ia. Mafua aisea? Ua pogisa le vaai o tagata i le taua ma le aoga o mea na faia e le Atua. Ua mafua ai ona tele le faatama'ia ma le faaleagaina. Ae mafua lena mea ona ua pogisa fo'i le tagata i le Atua soifua, le na faia le foafoaga. O le agasala o le tagata, ua ala ai ona lilo le mana o le Atua i le lalolagi. A toe fo'i a la i le manatu autu i le v.18, o lona uiga, e ala ona lē faatusatusa mea o loo tutupu nei, e pei ona taua i le fuaiupu e 18, ma le manuia atali, aua ua amana'ia e le tagata mea na faia e le Atua, e iloa manino ai le mamalu o le Atua. A tuu i seisi faaupuga, e taula le faamoemoe o le foafoaga i le tagata ua na iloa le Atua.

Ua uma atu le vaaiga a le foafoaga i le v.19-21. O fuaiupu e 22-23, o loo ua faamatala le vaaiga o le afaatuatua. O se vaaiga o loo ola i faafitauli ma mafatiaga o le olaga. I le ma lea, faapei ona mafatia le foafoaga i le pala ma le faatama'ia, e faapena fo'i ona mafatia le tagata i le agasala ma le oti. A tuu fo'i i leisi ona itu, e faapei ona faatalitali le foafoaga i le

faaeaina o le afaatuatua, e faapea fo'i ona faatalitali le afaatuatua e avea i latou ma suli moni o le Atua e ala ia Iesu. O lona uiga, ua faaopoopo ai e Paulo, e le gata o le foafoaga, a ua faaopoopo atu ai ma Iesu le Mesia i le ata o le manuia atali. Ae pei ona ia ta'ua i vv.1-17, e mai le Alii o Iesu le Agaga mo e faatuatua.

O le ata la o le sa'olotoga e pei ona aumaia e Paulo i le vv.22-23, o le lavea'i o le tagata faatuatua mai agasala ma noanoataga o le tino. A o se lavea'i e auala mai i le Agaga o le Atua ua fai ma o latou tofi. A ola faatasi le fanau faatuatua ma le Agaga o le Atua, e ola i se olaga faapa'aina male mata'u, na te iloa le mamalu o le Atua. A toe fo'i a i le manatu autu i le v.18, o lona uiga, e ala ona lē faatusatusa mea o loo tutupu nei, e pei ona taua i le fuaiupu e 18, ma le manuia atali, aua ua fai le Agaga o le Atua ma tofi o le afaatuatua ma tagata. A tuu i seisi faaupuga, e taula le faamoemoe o le tagata ma le afaatuatua i le Agaga o le Atua soifua.

O le auga la o manatu a Paulo, e ui ona eseese faamoemoe o le foafoaga ma le tagata, ae felagolagoma'i. E faamoemoe le foafoaga i le sa'olotoga mai le faatama'ia ma le le amana'ia, ae faamoemoe le tagata i le sa'olotoga mai noanoataga o le agasala ma le faaeaina. O le faaaliga atoa fo'i lena – o le amana'ia o le foafoaga ma le faaeaina o le tagata. A o le taunuuga o ia faamoemoe, o le mamalu ma le mana o le Atua ua faaalua ma iloa e le tagata ma le foafoaga, e pei ona iloa i le amataga na faia ai e le Atua le lagi ma le lalolagi. O le mea taua la i uiga o upu a Paulo, e tasi lava le foafoaga ma le tagata i le faaolataga na faia e le Atua e ala i a Iesu le Mesia. O le ala lena, ua mafua ai ona faapea Paulo, e le faatusaina o mea e tiga ai ma le manuia atali o loo ua faaalua.

### III. O le Faaliliuina o Roma 8:18-23

O le a la se uiga o lena ata i le mafaufau o Samoa? Faapefea ona faaliliu aano o upu a Paulo i le gagana e malamalama lelei ai Samoa? O le a le uiga o le faaaliga, "e tasi lava le foafoaga ma le tagata i le faaolataga na faia e le Atua e ala i a Iesu le Mesia?" E mafai ona tatou faaliliuina ma faapea, "E tonu le ta agaiFanua i le faaolataga na faia e le Atua e ala i a Iesu le Mesia." E mafua ona ou faaliliuina faapea, aua o le "Fanua," o le ta upu lena mo le foafoaga – o le elelee, sami, ma mea o le lagi. Ae tasi le tagata ma le Fanua i ona agaiFanua. O le uiga o le manatu, e le mafai ona vavae esea le tagata mai le uiga o le upu fanua. E aofia i le uiga o le upu Fanua, le tagata na ola ma tausia e le fanua, ae maise o ana tu ma aga. Aua fo'i e faatonutonu e le elelee, sami, ma mea o le lagi o a tatou amioga, le savali, le tu, le nofo, le tautala, ma isi. E mafua ai le upu tapuaFanua. O lona uiga, o le tagata ma ana tu ma aga, o tualeelele ia o le uiga o le upu Fanua.

Afai ua ia Keriso tu ma agaiFanua a Samoa, o le ta alafua lena i le faaolataga na faia e le Atua. E le na o le faa-Keriso, aua e leai se mea i lalo o le la ua na o le Agaga. E le na o le faaSamoa fo'i, aua e leai se mea i lalo o le la ua na o le tino. A o le faaSamoa ua ia Keriso. Afai la e tasi le foafoaga ma le tagata i le silasila a Paulo, e tonu fo'i le ta agaiFanua i le Atua e ala i a Iesu le Mesia. E mafua aisea? O le ta Fanua – le ea, sami, ma le lagi – e tatou iloa ai galuega mamana o le Atua. Afai fo'i e sa'o le mau a le afioga i a Tupua Tamasese, e soo gafa le tagata ma Tagaloa Lagi, o lona uiga e segia le mau i o

le tagata i le Agaga o le Atua e ala i lona faatuatua i a Keriso.

#### IV. O le Faaogaina (Application) o Roma 8:18-23

A faitau le tagata i le Roma 8:18-23, e mafai ona faapea, “E ao ona tatou tausia le foafoaga, aua o loo oi faatasi ma i tatou, a o galueina le faaolataga o le Atua.” Ae faapefea ona tatou tausia le foafoaga e aofia ai le lalolagi atoa? O se galuega e le mafai ona fai toatasi e Samoa. Ae mafai ona tatou faapea, tausi le ta pito lalolagi na tofia e le Atua mo taua. O se tasi auala e faatino ai lea fuafuaga, tausi le ta siosiomaga, tausi le Fanua i lenei vaega o le lalolagi o loo tatou iai. E aofia ai le tausi ma faaolaola o le ta agaifanua, ae maise le ta gagana. E le mafai ona ta tausia fanua ma agaifanua a Peretania ma Siamani, Farani ma Amerika, leaga e le o se tatou tofi, ma e mamao toe e le malamalama ai taua. Ae tausi mea na fai mealofa mai ai le Atua mo tatou i lenei vaega o le Pasefika.

E mafua ona ta’ua lenei mea, aua atonu o se tasi lea mafuaaga tele ua ala ai ona mimini fuainumera o tatou aulotu ae faaopoopo fuainumera o isi ituaiga lotu. Afai e tau su’e le mafuaaga, oute taofi, e mafua ona ua mou atu le agaifanua a Samoa i le malamalama o tatou tagata ae maise fanau. O le a le fesootaiga o na mea ma tatou aulotu? Aua fo’i o tu ma aga a Samoa na faavae ai faatinoga o le ta tapuaiga faa-LMS mai le amataga.

E mafua aisea ona tapua’i filemu le tatou ituaiga? E mafua aisea ona faataua le tofu sao o tagata uma i le faiga taulaga? E mafua aisea ona faalogo mulimai i a muamai? E mafua aisea ona filifilia e niisi o nuu ae le o ekalesia o latou faifeau e fai ma feagaiga tausi? E mafua aisea ona taua le mafutaga a Toeaina? E iai le taofi, e mafua le tele o ia measina poo faiga o le tatou ituaiga, ona o tu ma aga na afua mai i lo tatou fesoota’i ai ma le Fanua, e aofia ai le vafealoa’i, faaaloalo, ma le alofa. E aofia ai nuu maopoopo ma le tasi o le loto, ae le o le salalau ma le taapeape.

E faalogoina soo, e faapea mai niisi, na mafua ona o ese le toatele, aua na o le fia momoe i taimi o lotu. Fai mai niisi o tatou aulotu i fafo, e oo foi i Samoa nei, ua le malamalama i le gagana a le faifeau ma ana lauga. Fai mai niisi, ua tele mea e fai. Fai mai niisi, ua taugata le tautua lotu. Atonu e moni niisi vaega o ia faitioga, aua o mea o loo vaaia. O le fesili, o fea e amata ai le tatou galuega e apo mai agaga o tagata? O le popolega, e fiu tatou e fegugui, faafaigofie, pe faaolaola o a tatou sauniga ma aulotu i le faaopoopo ai o isi faiga, ae le uma ai le mimini. O le uiga o le manatu, ne’i fiu tatou e tau teuteu ma oti lau laau, ae vaai atu lava i le aga’i a ona pala le laau. E iai le taofi, e le o se sese o a tatou faiga na ala ai ona mimini aulotu. E mafua le tele o ia lagona ma o ese le toatele ona ua manunu le pogai ma a’o a tatou ituaiga tapua’iga. Ua mafua ona ua tau mou atu le faaSamoa. O lona uiga, ua tau mou atu le malamalama ma galo le taua o tu ma le agaifanua, e aofia ai ma le gagana, na faavae ai o tatou mea e fai i totonu o a tatou ekalesia.

Ua avea le lē malamalama ma le galo o ta agaifanua masani ma mea ua fesiligia ai o tatou faiga faavae. Ua fesiligia ai le tapua’i filemu pe a fai sauniga mamalu. Ua fesiligia ai tu ma aga faaaloalo e faatino i le aufaigaluega. Ua fesiligia ai le taua o Toeaina ma mafutaga faaEkalesia. Ona malie lea ma faatosiga gofie i tu ma aga faa-Amerika, faa-Peretania, o loo

faavae ai isi ituaiga tapuaiga (i.e. Mamona, Assembly, etc.). O le mea e malie ai, saunoa le afiga a le Peristene o le Senate, le tofa ia Tualau, ina ua mae’a le latou sailiiliga ma asiasiga i ekalesia eseese o le atunuu o Tutuila ma Manu’a, ma fai mai, o le tasi mea mata’ina i le lotu Mamona ua latou iloa nei, e leai so latou tupulaga e ta’u mai i le aisa poo ni isi faafitauli o loo ta’u mai ai tupulaga o le atunuu. O le mafuaaga, e pei ona iai le latou mau, ona o le malosi o le latou tapu i fualaa faasaina. I le ma lea, e faamalositia i o latou aoaoga le taua o mafutaga faaleaiga e pei ona iai polokalame ma vasega. E ui a ona le amana’ia e le Mamona o tatou agaifanua, ae o lo o latou faamalositia o ni isi tapu o le tu ma le aga taua o le tatou faaSamoa, le soifua maloloina ma le aiga.

Afai e tonu o ia manatu, **e iai le taofi, o le ta galuega e fai, ia faaolaola i mafaufau ma loto o tupulaga ma tagata lolotu, le taua o mea na fai mealofa mai ai le Atua mo Samoa. O le a lea, o le ta Fanua ma ona tapuaifanua e ala i le tu ma le aga, faatasi ai ma le gagana, ua o faatasi ma le Tala Lelei ia Keriso.** Ia fai lena ma faavae tauave. E pei ona ta’ua, e fiu tatou e teuteu ma taoti lau laau, ae a lē faasusu a’a na toto e tuua, e i’u na pala le laau. I le ma lea, se mea a matagofie, pe a faalologo mai tagata ua galulue faatasi ma le felagolagoma’i o Ekalesia Faapotopotoga Kerisiano o Samoa na lua. Aua e leai seisi mea e sili ona o gatusa ma le ta agaifanua male faa-Kerisiano, i loo le tatou galulue soosoo tauau i le Tala Lelei.

Afai na manatu Paulo e tasi le foafoaga ma le tagata i le faaolataga na faia e le Atua e ala i a Keriso, ma tatou iloa le mamalu o le Atua i mea na ia faia, e aofia ai le tagata, o lona uiga, pe a faaliliu i se isi faaupuga, e tonu le ta agaifanua i le faaolataga na faia e le Atua e ala ia Keriso, auā e tatou te iloa le mamalu o le Atua i le Fanua na fai mealofa mai ai le Atua ia Samoa, e aofia ai le tagata i ona tapu ma le agaifanua.

\*\*\*\*\*

## Mafutaga Tupulaga Talavou - Pulega Tualauta & Leasina



O le manulauti o lea Mafutaga, “E iloa le la’au i ona fua” (A tree is known by its fruit). O le susuga i le faifeau toeaina ia Tony Hollister, na saunoa e fa’afeiloa’i le Pulega i mafutaga Tupulaga Talavou ta’itasi i lea aso. Na auai uma le

paia o le 'aufaigaluega i susuga i feagaiga, fa'apea fo'i faifeau nofo aiga ma a'oa'o i lea fa'amoemoe. E o'o fo'i i matua, na molimauina fo'i i lea aso le auai o matua e opogi le fa'amoemoe o Tupulaga Talavou. Na vaevaeina Tupulaga Talavou e molimau i ta'iala ta'itasi o le tusi 'Au Taumafai a le EFKAS. O le molimau i lea aso, e tele taleni ma agava'a o fanau Talavou ua fa'aaogaina ai e le Atua mo lana galuega. O pesepesega, siva fa'aleagaga ua tapeina e fanau e momoli mai ai le fe'au mo tupulaga o le Pulega fa'apea le atunu'u.

O le susuga i le failautusi o le Pulega Tualauta & Leasina, na saunoa e fa'afetaia le mamalu o le aofia na mafai ona mafuta atu i lea fa'amoemoe. Na ia saunoa fo'i mo le fe'au fa'aleagaga mo Tupulaga Talavou a le Pulega, aua lea fa'amoemoe taua. E fa'afetai ai fo'i i susuga i feagaiga o le Pulega Tualauta & Leasina, mo le mafutaga Tupulaga Talavou e auala mai ai se fe'au mo Tupulaga o le Ekalesia aoao. Fa'afetai fo'i i le Media a le EFKAS, mo le pu'eina o lenei fa'amoemoe lelei o Tupulaga. Alofagia pea e le Atua galuega uma ua tatou galulue ai. Ia avefa fo'i lea fe'au ua aumaia e Tupulaga Talavou o le Pulega Tualauta & Leasina, e fai ma lu'itau i le ola o Tupulaga Talavou uma o le atunu'u. E pei o le manulauti o lea aso, "E iloa le la'au i ona fua" E iloa le Tupulaga Talavou i fua o ana galuega ma lona vala'auina. O le fa'amalosi fo'i lea mo Tupulaga uma o le Ekalesia ma le atunu'u. O a lava vala'auina ua fa'aaogaina ai lo outou soifua, ia faia ma le loto atu i le Atua. Ia manatua pea, e iloga le Talavou i fua o ana galuega fa'atino.

*Saunia: Charis Sao AKF*

\*\*\*\*\*



*Celebration of Life*

*February 20, 2026*

Ua fai si leva e lei toe tusia ma lolomia e le Lamepa ni tala o tagata maliliu o le Ekalesia. O le manatu sa i ai, afai e tusia ma lolomi se tala mo se tagata e to'atasi e maliu, e tatau ona tusia ma lolomi se tala mo tagata uma. Auā e taua tagata

uma o le Ekalesia. Peita'i, afai o lea, o lona uiga o le a tumu nauā tusitusiga o le Lamepa i na o tala o tagata maliliu, a ua leai ni tala e faasalalau ai mea o lo o tutupu i le Ekalesia mo le silafia e le lautele o tagata lolotu.

Ona toe fetuuna'i lea o se taofi, seiloga o se tagata ua iloga lona sao i le Ekalesia Aoao ma lana galuega tala'i, ona lolomi lea o sana tala i totonu o le Lamepa; po o se tagata foi ua na siitia i luga le tulaga o le Ekalesia Aoao i ana galuega sa fai, ona talafeauga lea o sana tala e lolomi. Ae le gata i lea, o se tagata sa galue faamaoni mo le Ekalesia Aoao, ma o ana galuega sa fai a'o soifua, o lea lava e manuia ai le Ekalesia Aoao e oo mai i le taimi nei. Masalo o **Poialii Fiasili Puni Ipuniueseae Enesi Haleck** e talafeuga ai le fetuunaiga lea.

O Fiasili na amata lona soifua galue mo le Ekalesia Aoao i le Mafutaga Aoao a Tina, ina ua filifilia e fai ma Teutupe a le Mafutaga i le 2004, e tau mai i le 2018. O le Fonotele 2010, a o atugaluga ma to'atama'i le 'au usufono i le faaletonu o tupe faasoasoa a le Ekalesia Aoao i lona vaitaimi, na filifilia ai e le fonotele le tina ia Fiasili i le tofi Teutupe a le Ekalesia Aoao, seia oo ina gasegase ma see ese mai le tofi i le Fonotele 2022.

O tofiga ia e le soona nofoia e se tagata. O tofiga e le umi foi se taimi e seei ai se tagata e to'atasi, aua e palota e le lautele o le Mafutaga Aoao a Tina ma le Fonotele, ae fua i luga o galuega faatino a lē o lo o seei i le tofi. O Fiasili, e sefulu-fa (14) tausaga sa seei i le tofi Teutupe a le Mafutaga Aoao a Tina; sefulu-lua (12) tausaga sa seei ai i le tofi Teutupe a le Ekalesia Aoao; ae valu (8) tausaga o tauave faatasi e Fiasili tofiga uma ia e lua i le taimi e tasi—o le molimau lea i le faamaoni ma le lelei o galuega sa faatino e Fiasili a o galue ai i le tofi.

Ae le gata i lea, o Fiasili le Tina pito sili lea ona umi lona tautua i le tofi Teutupe a le Mafutaga Aoao a Tina. O le Teutupe pito sili foi lea ona umi lona tautua i le Ekalesia Aoao. I le ma lea, o Fiasili le Tina muamua lava ua se'ei i luga o le Laulaufono o le Fonotele. E le o ni tama'i matati'a ia sa ausia e le Tina ia Fiasili, e tusa ai ma le talafaasolopito o le Ekalesia Faapotopotoga Kerisiano i Amerika Samoa

A fua atu foi i ana galuega sa faatino a o seei ai i le tofi Teutupe, e logologoa tala o galuega a le Tina ia Fiasili. O se Teutupe sa lima mau ma aputiputi i tamaoiga faasoasoa a le Ekalesia. E lei soona faaalu vale se seleni a le Ekalesia e aunoa ma se faatagaga mai le paketi faale-tupe a le Ekalesia sa pasia e le fonotele. Sa faalogoina foi i molimau a isi, faimai sa fiu ai le 'Au Toeaina, fiu ai foi nisi o Komiti, i le lima mau o Fiasili. A o le molimau a Fiasili e le mafai ona faagaloina, "E sili lo'u alofa i tagatalotu ma lo latou foa'i mo le Atua e ala i faigā taulaga. E tatau ona puipui lelei ai."

O le tausaga nei 2026, o se tausaga ese lea i le manuia ma le siitia ai o le tamaoiga a le Ekalesia Aoao, i ana tupe teu ma tupe inivesi. O ia manuia ua aeae ai nei le Ekalesia, o fua ia o galuega sa feagai ai ma Fiasili i le 12 tausaga a o seei ai i le tofi Teutupe o le Ekalesia Aoao. E moni ai upu o le atunuu, "O le upega e tautau ae faagota." Na se'e ese Fiasili ma le tofi Teutupe i le Fonotele 2022. A o ana galuega sa feagai ai, o lea lava e manuia ai le Ekalesia Aoao e oo mai i le taimi nei.

Faamaise ma faamafanafana le Atua i le fanau faavauvau: Lorelei, Lafo ma Heidi; faapea fanau o fanau: Enesi Jr, Lorelei Fuaimamao, Rhine Tulafono, ma Adiel Leiesilika. Faamafanafana foi le Atua i le Aiga Sa Puni ma le EFKAS i Pago Pago!



## LISI O LE 'AUFAGALUEGA AGAVAA MO LE GALUEGA TAUSI 'AULOTU

O le lisi lenei o le 'Aufaigaluega i Faifeau Samoa (FS) ma A'oa'o Kanana Fou (AKF) o lo o avanoa ma agavaa mo le galuega tausī 'aulotu. Ua saunia lenei lisi ona o le finagalo a le Fono Tele (FT:16-26), e fesoasoani ai i 'aulotu o lo o tau saili ni o latou Faifeau. O suafa ia, e le gata o le 'aufaigaluega o lo o galulue nei mo le Ekalesia Aoao i Kanana Fou ma le Ofisa Tutotonu, a o latou foi o lo o galulue fa'amaoni i tua i 'aulotu ma Pulega e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i lenei lisi, ia fa'afesootai mai le Ofisa a le Failautusi Aoao i le imeli: [gensec@efkas.org](mailto:gensec@efkas.org), e fa'alauloia ai lou suafa i le taimi e toe lolomi ai le Lamepa.

### Ofisa Failautusi Aoao

Tupuivao Ioelu FS  
Tamilo Palepua AKF

### Ofisa A'oa'oga Kerisiano:

Setefano P. Lefale FS, *Fa'atonu*  
Vili Polikapo FS  
Penani Lefaoseu FS  
Ronald Tuimauga AKF  
Magaga Talo AKF  
Vagana Saili FS

### Ofisa Lamepa

Soosoo Tuiolomotu FS  
Gatai Patu AKF

### Aoga Mauauga Kanana Fou

Siaosi Suhren FS

### Pulega Fale Ta'u:

Ioane Ioane FS (Fitiuta)

### Pulega Sua:

Waiana Tanielu FS (Masausi)  
King Talamoni FS (Amaua)  
Magaga Talo AKF (Masefau)

### Pulega Sa'ole:

Setefano P. Lefale FS (Auasi)  
Vili Polikapo FS (Amouli)  
Edward Semaia FS (Aunuu)  
Siavao Iese FS (Alofau)

### Pulega Fagaloa:

Tumau Petaia FS (Fagaalu)  
Poutoa Leituala FS (Pago Pago)  
Tamilo Palepua AKF (Pago Pago)

### Pulega Itu'au

Isaako Matautia Jr FS (Fagasa)  
Vagana Saili FS (Matuu&Faganeanea)  
Ekueta Tyrell AKF (Nuuuli)

### Pulega Tafa o Kanana Fou

Tupuivao Ioelu FS (Petesa Tai)  
Siaosi Suhren FS (Ierusalem Fou)  
Gatai Patu AKF (Petesa Uta)

### Pulega Tualatai:

Sinaka Ulutu FS (Malaelo)

### Pulega Tualauta:

Penani Lefaoseu FS (Faleniu)  
Veteran Brown AKF (Iliili)  
Ronald Tuimauga AKF (Aolou)

### Pulega Alataua:

Soosoo Tuiolomotu FS (Poloa)

### Pulega San Francisco:

Moegagogo Tamasese FS  
Eliu Eseroma FS (Daly City)  
Ketese mane Tagaloa FS (Sacramento)  
Peter Fualaau FS (Sacramento)  
Vaise Poloka AKF (Sacramento)  
Euta Asifo AKF (Oakland)

### Pulega Seattle:

Talosaga Patea FS (Seattle IV)

### Pulega LA Matu:

Sugalua Filivaa AKF (Ola Fou LB1)  
Malaki Tauilili FS (Ola Fou LB1)  
Emosi Liaina FS (Ola Fou LB1)  
Tupapa Malaga AKF (Ola Fou LB1)  
Niu Sapolu AKF (SCCC)

### Pulega LA Saute:

Mose Mose FS (USC)

### Pulega Las Vegas:

Folauga Tupuola FS (Etena Fou)  
Saumaleato Fuimaono FS (Etena Fou)

### Pulega Alaska i Matu:

Poasa Maui FS (Faavae Fou)

### Pulega Alaska i Saute:

Tomasi Foilefutu AKF (Feagaiga Fou)

### Pulega Amerika Sasa'e:

Tata Falaile AKF (Vaomoana)

### Pulega Aukilani:

Tautalaaso Asiata FS (Ranui)  
Iulio Pati AKF (Wiri)

## LISI O 'AULOTU AVANO

O nisi ia o 'aulotu o le EFKAS ua avanoa i le taimi na lolomi ai lenei Lamepa, o le a aoga ai lenei lisi e saili ai so latou faifeau:

EFKAS Faleasao  
EFKAS Toafa o le Talalelei, Wittmann AZ

**IA SILAFIA:** O 'ATA UMA O LE LAMEPA, E MAFAI ONA E MAIMO A AI I LUGA O LE UPEGA TAFAILAGI, I LE TUATUSI:

<https://www.facebook.com/LamepaEFKAS/photos>

### TAUTUA PRINTSHOP

**EKALESIA FAAPOTOPOTOGA KERISIANO I AMERIKA SAMOA**

1 Kanana Fou, Pusa Meli 1537, Pago Pago, Amerika Samoa 96799  
Telefoni: +(684) 699-9810 / Tuatusi Upega Tafailagi: <https://efkas.org>